

*Cu apertura di exposicion tocante
Status Aparte:*

EDIFICIO NOBO DI DEPARTAMENTO DI CULTURA INAUGURA



ORANJESTAD(AAN): -- E oficina nobo di departamento di Cultura, a wordo inaugura ayera-tardi.

Esaki a socede pa medo di apertura di un exposicion tocante di Status Aparte, Himno y Bandera cu ta tumando lugar pues, den e Maria Convent.

E exposicion y mes ora e edificio, a wordo habri oficialmente door di Lily Beke, e ministro concerni.

Den su speech, e ministro a trece pa dilanti cu e Maria Convent ta un di e lugarnan di mas stima y recorda pa pueblo di Aruba.

E souernan Dominicanesen tabata tin nan hogar ey, na unda nan a dedica nan mes na nos comunidad.

Beke a bisa cu te e dia di awe, Aruba ta sinti falta di e souernan cu tin un recuerdo grandi den nos curazon, bida y historia.

E exposicion mientrastanto, ta den cuadro di e celebracion di diez aña di Status Aparte y binti aña di Himno y Bandera.

Den palabra di señora Beke:

"Den e sala na unda e exposicion ta situa, pueblo lo haya e oportunidad pa mira y corda historia di e lucha pa Status Aparte.

Cu nos ta celebrando tambe, e binti aña di nos Himno y Bandera, ta pasobra cu Aruba tabata decidido pa su Status Aparte y a mira den realisacion di e Himno y Bandera, e motivacion di mas grandi y realistico pa mantene nos pueblo uni.

Un pueblo sin un Himno y Bandera, ta un barco sin rumbo y destino.

Hopi ta esnan cu na momento cu nan bishita e exposicion lo trece recuerdonan grandi di e Arubianonan cu a pone e inicio na e lucha, cu apesar di e forma anticua di comunicacion, tabata sa pa hiba e mensahe den cada skina di e hogarnan Arubano".

E ministro a menciona politiconan manera Henny Eman, Shon A. Eman, Jauncho Irawsquin, y Betico Croes, di kende el a bisa:

"Den e ultimo decadan, un balente yiu di tera a sa di tuma e lucha den un forma decidido pa hiba esaki te na su final.

Betico Croes, awe den feliz memoria, a ser inspira desde hoben cu Aruba tin e derecho pa para riba su propio pianan y dicidi riba su destino.

Esnan cu a conoce y tabata tin e oportunidad di a papia cu ne, tabata testigo di su firmeza y su actitud di un Arubiano confia den su pueblo.

E tabata e architecto principal di nos himno y bandera pasobra su deseo semper tabata ta, pa mira nos bandera bula entre esnan di paisnan liber y nos himno resona y canta cu tur honor y fervor. Semper nos lo keda recorde cu hopi respet y amor".

Finalmente, e ministro a haci un suplica na henter pueblo di Aruba y especialmente e hubentud pa bishita e exposicion.

